

NOS hendenan SPECIAL

Sr. Humbertus de Windt:

DIA 1 DI MAART TA BAY CUMPLI 25 AÑA DEN SERVICIO MILITAR

Ademas, ta hopi activo den deporte!

Redacta pa : Mercedes Abdul

DIARIO tin como invitado awe den su espacio "Nos Hendenan Special", Sr. Humbertus Damascus de Windt, kende ta bay cumpli 25 aña den Servicio Militar, dia 1 di Maart 1996.

E ta un persona hopi activo den deporte, y fuera di esey e ta cuidador di paloma mensahero.

Sr.de Windt a pasa su enseñanza basico na St.Dominicus College, despues el a sigui den direccion di LTS na J.F.Kennedy School unda cu el a haci Bankwerker cu el a finaliza den 3 aña obteniendo su diploma den dje.

Despues cu el a bay Schakelklas un aña y como cu nan a hacie di UTS pa MTS, el a bira mas largo, el a dicidi di kita for di school y bay traha.

"Mi a cumenza traha na CONAR N.V. Tempo cu mi tabata trahando cu e compania aki, na december 1970, nan a yamami pa Servicio Militar Obligatorio. Ora mi a pasa mi testnan cu bon resultado nan a manda yamami dia 1 di Maart 1971 pa drenta den e servicio militar.

Despues cu mi a cumpli cu mi e parti basico di seis luna, un grupo di nos no tabata sa cu nan tabata selectando cierto candidatonan pa bay sigui un curso pa Kader.

Na 1971, na Juli, mi a bay pa Korporaal, pa cual mi a slag den seis luna y na Maart-1971 mi a worde promovi pa Korporaal.

Mi a bay bek den e opleiding pa entrena e muchanan durante e prome lunanan basico, y despues di 2 aña y mey, na 1973, nan a bolbe yamami pa mi bay studia pa Sargento.

Dia 1 di Maart di 1974 mi a bay bek Curacao pa studia pa Sargento cual curso, despues di 6 luna tambe mi a pasa cu exito.

Despues di eynan mi a pasa den diferente funcion den Kazerne, y na aña 1988 nan a bolbe yamami pidimi pa mi sigui un curso di Sargento Mayor cual curso mi a termina na 1989 y for di Juli-89 mi a worde promovi pa Sargento Mayor te cu dia di awe, mi ta cargando e rango aki".

Durante su añanan di servicio Sr.de Windt a bay diferente curso duna door di Marina na

Hulanda, e.o: PBA (Personeels Beoordelings Adviseur), Management Opleiding, Instructie Techniek di cual cursonan e tin nan diploma.

UN TIKI STORIA

Sr. de Windt ta haya importante pa conta den cortico un parti di e storia di Servicio Militar for di tempo cu Aruba tabata den e Constelacion Antiyano.

"Na aña 1954, Articulo-3 di Statuut nan a bin cu e defensa pa e parti di Reino Hulandes, lanta Servicio Militar Obligatorio.

Dia 29 di December 1961 nan a introduci un ley pa Militarnan den servicio obligatorio.

Dia 1 di Juli 1963 nan a cumenza cu e prome grupo di Servicio Militar Obligatorio. Na 1970 gobierno di Antiyas tabata tin pensa di lanta un Antilliaanse Verdedigingsgarde.

For di akinan e necesidad pa Kader Antiyano a lanta.

Despues cu e Antilliaanse Verdedigingsgarde no a bay door, nan a lanta e Antilliaanse Militie.

Despues di Status Aparte Arubaanse Militie a worde introduci loke a drenta na vigor na December 1986, di unda e number "Arumil" a nace".

Sr. de Windt ta menciona cu prome cu 1986 e servicio militar obligatorio di Aruba y Antiyas tabata cay directamente bao di Reino Hulandes.

"Financieramente, tur e gastonan tabata cay bao di cuenta di Marina y bo famia a worde asegura mescos cu un ambtenaar di gobierno pa loke ta toca servicio di medicina (docter, hospital, botica, etc).

Despues di a cay bao Aruba e problemanan a cumenza door cu nos no tabata exactamente na haltura di kico e contract nobo tabata encera bao di Gobierno Arubano y despues di a studia e contract bon nos a bin ripara

cu tabata tin un diferencia hopi grandi den salario, loke te ainda nos ta bringando pe".

25 AÑA DEN SERVICIO

Tocante su trayectoria di 25 aña den servicio militar, Sr.de Windt ta relata lo siguiente:

"Mi ta haya cu e disciplina y respet di antes tabata hopi mas severo cu awendia, y mi ta kere cu door cu e militarnan Hulandes ta gana asina hopi placa na Antiyas y Aruba, e diferencia di placa no ta un estimulo pa nos hobennan cu kier drenta den servicio militar obligatorio di Aruba, y mas ainda si tene cuenta cu tin un diferencia di salario di e muchanan cu tin di sirbi un aña di servicio obligatorio y e kader bieu, entre Aruba y Antiyas. Esaki ta nifica cu Arumil ta keda mas abao cu Hulanda y Antiyas.

Ademas di esaki tin dos ley cu worde elimina completamente cualnan ta: "Verzwaart-arest" y "Strengarest". Awor, na moda di bisa, bo no por "cera" un mucha manera antes, ora e comete un falta.


Un cos si mi por bisa, cu e muchanan cu nos tabata haya antes den servicio tabata tin mas disciplina y respet for di cas, cu aworaki, siendo cu antes bo tabata haya muchanan cu mehor nivel escolar den servicio militar.

Si gobierno, den futuro tin pensa di sigui cu e servicio obligatorio, of algo similar, e mester tene bon cuenta cu aspecto di salario. Esey mi ta kere ta un di e problemanan mas cardinal cu tin".

MEDAYANAN

Sr. de Windt a ricibi hopi medaya tanto den servicio militar como door di competencianan deportivo, prome cu el a drenta servicio militar, durante y pafu di e servicio.

"Mi tin un di 12 aña den servicio militar, y mi tin di 24 aña. Riba tereno deportivo mi a destaca den futbol, atletismo,



Sr. Humbertus Damascus de Windt

basketball. En total mi tin mas of menos un 200 medaya entre bronze, plata y oro".

Na aña 1990 el a worde nomina pa **DIARIO** como un di e deportistanan cu a destaca e aña ey.

Sr.de Windt actualmente ta activo den deporte di surf, hunto cu su yiunan.

OTRO FACETANAN

Sr. de Windt a yuda hopi riba tereno deportivo, den organizacion di carnaval, y e ta cuidador di paloma mensahero for tempo cu e tabata un mucha, y tambe el a yuda hopi riba tereno di verkenerij.

"Entre otro, ami hunto cu Amador Oduber, Anthony de Cuba, Frankie Kuiperi a introduci na Aruba e Pee Wee. Ora cu nos a haya e reglanan di Williams Sport nos a mira cu na Aruba nos tabata tin e basenan.

Mi a yuda den Little League tempo cu mi yiunan tabata aden, y hunto cu Frankie Kuiperi mi a lanta den Karate. Un di mi educadornan den servicio militar tabata e entrenador di karate di Frankie Kuiperi, sr. Poeteray, y te cu dia di awe mi ta train karate regularmente".

Tambe de Windt ta hopi activo den organizacion di

carnaval.

"For di tempo cu Lighting Parade a cumenza mi ta activo den organizacion, door cu mi señora a lanta den e cuna di carnaval cual ta Club Tivoli.

For di tempo cu mi tabata un mucha di 6 aña, mi a lanta como un criador di paloma mensahero te awor cu mi ta activo cu mi mesun palomanan. Antes tabata tin un club na Aruba, pero door cu mayoria di e miembronan tabata maestro di school cu a bin for di Hulanda, ora cu nan a bay bek, e club a cay den otro".

FAMIA

Sr. de Windt ta casa cu Sra. Nadya Federica Arends, di cual matrimonio tin 2 yiu homber, Humbertus Damascus de Windt Jr., y Jarzino Frederick de Windt.

"Semper mi a lanta mi yiunan mescos cu amigo di mi, cu disciplina y respet, y interes pa deporte". Un preocupacion hopi grandi cu sr.de Windt tin ta e problema di droga den hubentud, y tambe e medio ambiente, con nos mesun hendenan ta sushando Aruba.

"Mi ta kere cu ta un trabao di comunidad y gobierno pa combati e dos problemanan aki".